

RAPPORT ANNUAL 2023

FINAMIRAS, SITUAZIUN E FACIT

Actualmain dispona l'uniun d'ina situaziun finanziaria sauna che lubescha surtut era da sustegnair noss project «chalender.ch». Da l'autra vart n'han las stentas per regiuvinar noss commembradi e la suprastanza anc betg gi l'effect giavischè. Igl è impurtant da s'engaschar vinavant ed era da ponderar novas furmas e chanals per render attractiva l'uniun en il temp dad oz. Igl è in fatg che las uschenumnadas medias socialas giogan oz ina rolla impurtanta en la vita da mintgadi da bunamain tuttas e tuts. Quai vul dir che la comunicaziun cun ed entaifer las commembras ed ils commembers succeda en il futur adina dapli sur quests chanals. I vala qua da chattar bunas soluziuns. Nus vegnin ad agir maun en maun cun las finamiras e realisaziuns da la Lia Rumantscha (LR) en il sector da la digitalisaziun.

REALISAZIUNS

Il 2023 avain nus pudì realisar differentas occurrenzas che han attratg mintgamai in public interessà.

«TAVULINS»

L'onn da gestiun han gi lieu otg «Tavulins» mensils. Quels èn per nus in zic il «Café rumantsch» da Turitg ch'exista gia dapi passa sis onns e che represchenta oz in'occurrentza ch'è part integrala da nossas activitads. Per usit han quels lieu mintgamai en il restaurant Commihalle, damanaivel dal Central a Turitg. Ils 3 d'october avain nus realisà in emprim «Tavulin» en la Bar Boucherie dal mazler *Hatecke* da Scuol. Ensemen cun nossas discussiuns animadas avain nus era pudì giudair las specialitads da chatscha bain preparadas. Er il 2024 vegnin nus ad ans inscuntrar ina giada en questa localitad.

RADUNANZA ANNUALA

La radunanza annuala ha gi lieu ils 13 da matg 2023 en las localitads dal restaurant Giesserei ad Oerlikon/Turitg. In stupent dumber da personas è stà preschent a l'occurrentza. Sper las tractandas tenor statuts avain nus gi plaschair da pudair beneventar *Andreas Gabriel*, il secretari general ad interim da la LR. El ha dà ina survista interessanta da las activitads actualas e da las sfidas futuras da la LR. Silsunter essan nus stads da cumpagnia ed avain giudì in puschegn, sa chapescha era cun discussiuns animadas tranter commembras, commembers e giasts.

INSCUNTER/CONCERT/SAIRADA CUN FILM

Ils 24 da favrer 2024 avain nus organisà ensemen cun Radiotelevisiun Svizra Rumantscha (RTR) e la Cuminanza Rumantscha da Berna (sustegnida da la LR) in

inscunter en la chapitala federala. *Flavio Huonder* da RTR ha preschentà la plattafurma «nossaistorgia.ch». Quella cuntegna oravant tut documents fotografics dal passà e po vegnir consultada ed era cumplettada da tuttas e tuts; in aspect plain passiu per il passà da nossas generaziuns da pli baud. Ensemen cun *Sep Sgier* ha *Flavio Huonder* era procurà per il rom musical durant l'occurrentza.

Ils 9 da mars 2023 avain nus organisà a Turitg il concert da cumià dad *Aita Biert* e *Men Steiner*. In public interessà è sa rendì en il restaurant Giesserei a Turitg/Oerli-kon per giudair la davosa giada in concert dal duo *Aita & Men* ch'è stà activ durant tschintg decennis. Sper il divertiment musical è er emeziuns e reminiscenzas sta-das impurtantas tranter il public ed ils artists. Ensemen cun ils sentiments da cumià hai dà plirs revairs allegraivels suenter lungs onns senza contact. RTR è era stà preschent ed ha registrà il concert; pliras contribuziuns èn da chattar sin:

www.rtr.ch/tschertga?q=aita+biert&date=all&page=0

Ils 17 d'october 2023 ha gi lieu a Turitg ina prepremiera dal film «I Giacometti», e quai en preschientscha da la reschissura e cineasta da Scuol *Susanna Fanzun*. Avant e suenter la preschentaziun dal film ha *Susanna Fanzun* raquintà da l'immen-sa lavur da retschertga da diesch onns ed ha era respundì a las differentas dumon-das dal public. Il film documentar davart la famiglia d'artists da la Bregaglia sveglia bleras emeziuns e lascha participar il public a las grondas ovras ed als merits da quella. Il success dal film è grond, quai tant sin plaun naziunal sco er internaziunal.

PROJECT «CHALENDER.CH»

La realisaziun dal project, sustegnida finanziailmain da l'Uffizi federal da cultura, ha cumenzà la primavaira 2023 ensemen cun l'interpresa far.ch e RTR. Igl è planisà da lantschar l'app – che vegn ad esser in pass impurtant per la digitalisaziun dals servetschs en favur da la Rumantschia – en il decurs dal mais da mars 2024 (www.chalender.ch).

SUPRATANZA

Roman Pfister president
Gaudenz Caveng cassier
Daniel Monn assessur

Elisanna Nuotclà vicepresidenta
Nino Enderlin actuar
Lars Prevost assessur/multimedia

www.uniun-urb.ch

www.chalender.ch

www.facebook.com/uniun-urb

Uniun URB



Roman Pfister, president

Schwerzenbach, avrel 2024